

Na osnovu člana 13. stav (2) alineja 4. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, br. 49/06 i 51/09), člana 6. Zakona o komunalnim taksama („Službene novine Kantona Sarajevo“, br. 8/22), člana 10. i 68. Statuta Općine Centar Sarajevo – prečišćeni tekst („Službene novine Kantona Sarajevo“, broj 23/04) i člana 87. Poslovnika Općinskog vijeća Centar Sarajevo-prečišćen tekst („Službene novine Kantona Sarajevo“, broj 23/04, 11/13, 13/17, 24/19, 31/19 i 29/20), Općinsko vijeće Centar na 16. redovnoj sjednici održanoj dana 07.04.2022. godine d o n o s i

ODLUKU

o utvrđivanju kriterija i visine komunalnih taksi na području Općine Centar Sarajevo

DIO PRVI OPĆE ODREDBE

Član 1. (Predmet)

Ovom odlukom utvrđuju se vrste komunalnih taksi, obveznik plaćanja, kriteriji, zone i visina takse, način plaćanja, oslobađanje od plaćanja, način prijave, naplate takse i povrat takse za obaveznike na području Općine Centar Sarajevo (u daljem tekstu: Općina) u skladu sa Zakonom o komunalnim taksama („Službene novine Kantona Sarajevo“, broj: 8/22) (u daljem tekstu Zakon).

Član 2. (Definiranje pojmova)

(1) Pojmovi u smislu ove odluke:

- a) istaknuta firma podrazumjeva oznaku, obilježje ili natpis na radnim i drugim prostorijama, na fasadi građevine u kojoj se nalaze radne prostorije ili van gabarita te građevine, na ulaznim vratima, izlozima/portalima ili unutar izloga radnih prostorija, kojim se označava da određeno pravno ili fizičko lice obavlja izvjesnu djelatnost ili zanimanje;
- b) sredstva za igre na sreću (bilijar, automati, fliperi, video igre, pikado, aparati za posebne igre na sreću i sl.) podrazumjevaju mehaničke, elektronske ili slične uređaje čije korištenje od jednog ili više učesnika u konačnici donosi mogućnost ostvarenja određenog dobitka;
- c) poslovni prostor u kojem se priređuju klasične igre na sreću i posebne igre na sreću podrazumjeva svaki prostor u kojem se organizuju i priređuju klasične igre na sreću i/ili posebne igre na sreću u smislu Zakona o igrama na sreću („Službene novine Federacije BiH, br. 48/15 i 60/15);
- d) držanje i izvođenje muzike uživo u ugostiteljskim objektima podrazumjeva povremeno ili svakodnevno izvođenje muzičkog programa uz pružanje ugostiteljskih usluga;
- e) postavljanje uređaja za isplatu i naplatu gotovine (bankomata), podrazumjeva svako zauzimanje površine radi postavljanja i instaliranja ovakvih uređaja u svrhu pružanja usluga prema konzumentima;
- f) postavljanje uređaja koji putem automatske obrade podataka naplaćuju usluge gotovinom, karticama za naplatu, ili posredstvom telekom operatera (kafemati, parkomati i sl.) podrazumjeva se postavljanje navedenih uređaja koji automatskom obradom podataka obračunavaju i naplaćuju razne vrste usluga bez

osobnog posredovanja konzumenta sa pružaocem usluga koji može biti registrovan kao fizička ili pravna osoba.

DIO DRUGI OSNOV I POČETAK NASTANKA OBAVEZE

Član 3. (Osnov za plaćanje takse)

- (1) Na području Općine Centar Sarajevo utvrđuje se i naplaćuje komunalna taksa za:
 - a) svaku istaknutu firmu;
 - b) držanje sredstava za igru i igre na sreću (bilijar, automati, fliperi, video igre, pikado i aparati za posebne igre na sreću);
 - c) poslovni prostor u kojem se priređuju klasične igre na sreću i posebne igre na sreću;
 - d) držanje i izvođenje muzike uživo u ugostiteljskim objektima;
 - e) postavljanje uređaja za isplatu i naplatu gotovine (bankomata) i
 - f) postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.).
- (2) Izuzetno od odredbi stava (1) tačke a) ovog člana, taksa se ne plaća za istaknutu firmu čija tabla odnosno oznaka ne prelazi dimenzije 200x300 milimetara.

Član 4. (Isticanje firme)

- (1) Pravna i fizička lica koje obavljaju privrednu djelatnost na osnovu odobrenja nadležnog organa dužna su na vidnom mjestu prostorija u kojima obavljaju djelatnost (sjedište i poslovne jedinice) istaknuti naziv firme pod kojim posluje.
- (2) Pod nazivom firme se podrazumjeva:
 - a) naziv firme pod kojim je takseni obveznik registrovan kod nadležnog organa odnosno naziv poslovne jedinice kada se firma ističe na poslovnoj jedinici;
 - b) sjedište lica i broj.
- (3) Firma se ističe najkasnije danom početka obavljanja djelatnosti.

Član 5. (Početak nastanka obaveze)

- (1) Taksena obveza iz člana 3. stav (1) tačka a) ove odluke nastaje danom izdavanja rješenja o registraciji fizičkog i pravnog lica.
- (2) Taksena obveza iz člana 3. stav (1) od tačke b) do f) ove odluke nastaje od trenutka otpočinjanja pružanja usluga, korištenja uređaja ili prostora za čije korištenje je ovom odlukom propisano plaćanje komunalne takse.

Član 6. (Obveznici plaćanja takse)

- (1) Takseni obveznici su sva pravna i fizička lica registrovana za obavljanje djelatnosti i koji istu obavljaju na području Općine Centar Sarajevo, odnosno lica koja pružaju usluge ili koriste uređaj, prostor za čije korištenje je propisano plaćanje takse.
- (2) Ako za istu taksu postoje dva ili više obveznika, njihova obaveza je solidarna.

DIO TREĆI NAČIN PRIJAVE I NAPLATA

Član 7.

(Podnošenje prijave za razrez taksene obveze)

- (1) Obveznik plaćanja takse je svako pravno ili fizičko lice koje obavlja djelatnost na osnovu odobrenja nadležnog organa na području Općine odnosno koje ima istaknutu firmu, oznaku, obilježje ili natpis na poslovnim prostorijama i objektima kojim se označava da ista obavljaju djelatnost ili zanimanje u skladu sa pozitivnim zakonskim propisima, kao i posjednik uređaja iz člana 3. stav (1) tač. e) i f) ove odluke.
- (2) Prijavu za razrez komunalne takse iz člana 3. stav (1) tačke a), b) i e) porezni obveznik je dužan podnijeti Poreznoj upravi, Ispostava Centar (u daljem tekstu: Porezna uprava) do kraja februara tekuće godine, prema stanju na dan 01. januar tekuće godine za koju se razrez vrši, odnosno u roku od 15 dana od datuma izdavanja rješenja o registraciji ukoliko je porezni obveznik registrovao djelatnost u toku poslovne godine.
- (3) Pravno lice kao obveznik komunalne takse dužan je Poreznoj upravi podnijeti prijavu za komunalnu taksu isključivo elektronski, dok fizička lica mogu i putem Obrasca.
- (4) Prijavu za razrez komunalne takse iz člana 2. stav (1) tačke c), d) i f) porezni obveznik je dužan podnijeti nadležnoj službi Općine pet dana prije nastanka taksene obaveze.
- (5) Ukoliko takseni obveznik vrši prijavu u skladu sa odredbama člana 3. stav (2), dužan je dostaviti Poreznoj upravi ovjerenu izjavu o veličini oznake do 200x300 milimetara.
- (6) Izuzetno, prijava za razrez takse za 2022. godinu podnosi se do kraja aprila 2022. godine, a prema stanju na dan 01. januar 2022. godine.
- (7) Ukoliko takseni obveznik u propisanom roku ne podnese prijavu ili dostavi netačne podatke, prijavu takse će izvršiti Porezna uprava u roku od 15 dana nakon isteka zakonskog roka u skladu sa odredbama Zakona o Poreznoj upravi Federacije BiH i podzakonskim aktima.

Član 8.

(Rokovi za obračun i plaćanje takse)

- (1) Taksa iz člana 3. ove odluke obračunava se i plaća na način:
 - a) tačke a), b) i e) – jednom u toku kalendarske godine, u roku od 15 dana po isteku roka za prijavljivanje takse;
 - b) tačke c), d) i f) – po podnošenju prijave nadležnoj općinskoj službi.
- (2) Taksa na istaknutu firmu pravne ili fizičke osobe koja je na osnovu rješenja nadležnog organa prestala obavljati djelatnost u toku obračunskog perioda će se obračunati za broj mjeseci i dana u kojima je obavljala djelatnost.

Član 9.

(Zone)

Zone se utvrđuju u granicama zona utvrđenih članom 24. Odluke o dodjeli u zakup poslovnih zgrada i prostorija Općine Centar Sarajevo – prečišćeni tekst („Službene novine Kantona Sarajevo“, br. 20/09), i to:

- 1) **EXTRA ZONA:** ulica Maršala Tita u pravcu kretanja od zgrade Predsjedništva Bosne i Hercegovine do Vječne vatre, ulica Ferhadija u dijelu koji se nalazi na području Općine Centar Sarajevo.
- 2) **I ZONA:** ulica Maršala Tita od broja 1. i 2. do zgrade Predsjedništva Bosne i Hercegovine, Mula Mustafe Bašeskije u dijelu koji se nalazi na području Općine Centar Sarajevo, La Benevolencija, Mehmeda Spahe, Alije Isakovića, Danijela Ozme, Dalmatinska, Branislava Đurđeva, Dubrovačka, Džidžikovac, Alipašina (do raskršća sa ulicama Prusačka i Sutjeska), Kemal Begova, Gajev trg, Hasana Kikića, Jadranska, Branilaca Sarajeva, Jezero, Koševo, Hamze Hume, Mis Irbina, Mehmed-beg Kapetanovića Ljubušaka, Alekse Šantića, Obala Kulina bana, Prušćakova, Muhameda Kantardžića, Radićeva, Kaptol, Reisa

Džemaludina Čauševića, Kulovića, Buka, Sutjeska, Hadži Idrizova, Čemaluša, Šenoina, Trampina, Trg djece Sarajeva, Gimnazijska i Musala.

3) **II ZONA:** ulica Magribija, Vilsonovo šetalište, Kranjčevića, Augusta Brauna, Trg Bosne i Hercegovine, Fra Anđela Zvizdovića, Turhanija, Đoke Mazalića, Herceg Stjepana, Zmaja od Bosne, Vrazova, Valtera Perića, Dolina, Vrbanja, Hiseta, Franca Lehara, Dr Safeta Mujića, Koste Hermana, Franje Račkog, Hamida Dizdara, Mustajbega Fadilpašića, Kotromanića, Kalmija Baruha, Kralja Tvrtka, Maglajska, Hamdije Kreševljakovića, Tepebašina, Fehima efendije Čurčića, Terezija, Mjedenica, Obala Maka Dizdara, Ejuba Ademovića, Podgaj, Skenderija, Skenderija čikma, Skender Pašina, Tekija, Čobanija, Hakiye Kulenovića, Avde Hume, Mehremića trg, Halida Kajtaza, Dajanli Ibrahimbega, Prusačka, Mice Todorović, Alipašina (od raskršća ulica Prusačke i Sutjeske do stadiona Koševo), Patriotske lige, Ključka, Rizaha Šetića, Čekaluša, Josipa Vancaša, Višnjik, Zaima Šarca, Bjelave, Čekaluša čikma, Tahmiščina, Provare, Envera Čolakovića, Tahtali sokak, Miloša Mandića, Behaudina Selmanovića, Pinje Bajraktara, Romana Petrovića, Šekerova, Derebent, Zlatikuša, Kevrin potok, Tijesna, Bulbulina, Ludviga Kube, Curak, Pehlivanuša, Sarač Ismailova, Džemila Krvavca, Hadži Sulejmanova, Ivana Cankara, Armaganuša, Mejtaš, Mehmed paše Sokolovića, Sepetarevac, Dola, Tina Ujevića, Nikole Kašikovića, Ciglanska, Husrefa Redžića, Gabelina, Hazima Šabanovića, Bolnička.

4) **III ZONA:** obuhvata sve ulice koje nisu obuhvaćene zonama extra, I i II.

DIO ČETVRTI TARIFNI SISTEM

Član 10. (Tarifni sistem)

Tarifni broj 1.

(1) Fizičkim licima koja obavljaju privrednu djelatnost ili zanimanje i koja su registrovana u nadležnoj općinskoj službi ili kod nadležnog ministarstva, za svaku istaknutu firmu, oznaku, obilježje ili natpis na poslovnim prostorijama i objektima, obračunava se i naplaćuje godišnja taksa na način:

Red. Br.	FIZIČKE LICA	Z O N E			
		EXTRA	I	II	III
1.	Nije PDV obveznik	300,00 KM	250,00 KM	200,00 KM	150,00 KM
2.	PDV obveznik	600,00 KM	550,00 KM	500,00 KM	450,00 KM

- Samostalnim obrtnicima koji posluju na osnovu Uredbe o zaštiti tradicionalnih i starih obrta („Službene novine Federacije BiH“ br. 66/09, 38/10 i 16/12), a koji su razvrstani u kategoriju - paušalac, taksa se razrezuje u iznosu od 20% od iznosa utvrđenog za zonu u kojoj posluju.
- Samostalnim obrtnicima koji obavljaju usluge taksi prijevoza, a koji su razvrstani u kategoriju - paušalac, taksa se razrezuje u iznosu od 20% od iznosa utvrđenog za zonu u kojoj posluju.
- Samostalnim obrtnicima koji obavljaju djelatnost trgovine na malo – trgovac pojedinac, a koji su razvrstani u kategoriju - paušalac, taksa se razrezuje u iznosu od 50% od iznosa utvrđenog za zonu u kojoj posluju.

(2) Razvrstavanje pravnih lica će se vršiti u skladu sa Zakonom o računovodstvu i reviziji Federacije Bosne i Hercegovine („Sl. novine Federacije BiH“, br. 15/21), Republike Srpske („Sl. glasnik Republike Srpske“, br. 94/15 i 78/20) i Brčko Distrikta (Sl. Glasnik Brčko distrikt“, br. 22/16 i 50/18).

Red. br.	VELIČINA PRAVNOG LICA	Z O N E			
		EXTRA	I	II	III
1.	MIKRO	1.000,00 KM	950,00 KM	900,00 KM	850,00 KM
2.	MALO	2.000,00 KM	1.900,00 KM	1.800,00 KM	1.700,00 KM
3.	SREDNJE (sjedište)	5.000,00 KM	4.500,00 KM	4.000,00 KM	3.500,00 KM
4.	VELIKO (sjedište)	15.000,00 KM	14.500,00 KM	14.000,00 KM	13.500,00 KM

- Pravnim licima (srednja i velika) koja na području Općine Centar Sarajevo imaju jednu ili više poslovnica, taksa se razrezuje za svaki poslovni prostor u iznosu od 20% od iznosa utvrđenog za zonu u kojoj obavlja djelatnost.
- Ako za istu taksu postoje dva ili više obveznika njihova taksa je solidarna.

Tarifni broj 2.

- Za držanje sredstava za igru (bilijar, automati, fliperi, video igre, pikado i dr. sredstva za igre gdje je dobitak isključivo u određenom broju igara) plaća se komunalna taksa godišnje po jednom sredstvu odnosno uređaju, u iznosu od 800,00 KM;
- Za držanje sredstava za igru na sreću koja donose novac (aparati koji igraču daju mogućnost ostvarenja dobitka u novcu) plaća se taksa godišnje po jednom sredstvu, u iznosu od 2.000,00 KM.

Tarifni broj 3.

- Za priređivanje klasičnih igara u poslovnom prostoru plaća se taksa na mjesečnom nivou u iznosu od 100,00 KM.
- Za priređivanje igara klađenja na sportske rezultate i druge neizvjesne igre u poslovnom prostoru plaća se taksa u mjesečnom iznosu:
 - u Extra zoni 1.000,00 KM;
 - u I zoni 900,00 KM;
 - u II zoni 800,00 KM;
 - u III zoni 700,00 KM;

Tarifni broj 4.

- Za priređivanje muzike uživo u ugostiteljskim objektima plaća se komunalna taksa dnevno u iznosu od 100,00 KM;
- Za priređivanje koncerata, proslava i drugih manifestacija koje uključuju izvođenje muzike uživo u zatvorenom prostoru, plaća se taksa u iznosu od 2,00 KM/m²;
- Za priređivanje koncerata, proslava i drugih manifestacija koje uključuju izvođenje muzike uživo na otvorenom prostoru, plaća se taksa u iznosu od 3,00 KM/m².

Tarifni broj 5.

Za postavljanje uređaja za isplatu i naplatu gotovine (bankomati i sl.) plaća se taksa godišnje po jednom uređaju u iznosu 1.000,00 KM.

Tarifa broj 6.

Za postavljanje uređaja koji putem automatske obrade podataka naplaćuju usluge gotovinom, karticama za naplatu, ili posredstvom telekom operatera (kafemati, parkomati i sl.) plaća se taksa godišnje po jednom uređaju u iznosu 300,00 KM.

Član 11. (Visina komunalne takse)

- Visina takse se određuje u zavisnosti od zone i koeficijenta veličine pravne osobe ili djelatnosti koju obavljaju fizička lica.
- Koeficijent veličine pravne osobe u smislu kriterija o razvrstavanju pravnih osoba na osnovu Zakona o računovodstvu i reviziji Federacije Bosne i Hercegovine („Sl. novine Federacije BiH“, br. 15/21), Republike Srpske („Sl. glasnik Republike Srpske“, br. 94/15 i 78/20) i Brčko Distrikta (Sl. Glasnik Brčko distrikt“, br. 22/16 i 50/18) određen je u

tarifnom broju 1. Tarife takse sa oznakom (KV) – pravne osobe sa posljednjim završnim obračunom kod Finansijsko – informatičke agencije.

Član 12.

(Pripadnost i uplata taksa)

(1) Taksa iz člana 3. stav (1) tačka a), b) i e) ove odluke se uplaćuje na depozitni račun Budžeta Općine Centar Sarajevo, šifra Općine 077, sa naznakom vrste prihoda 722321 i pozivom na broj 0000000000 u skladu sa Pravilnikom o načinu uplate javnih prihoda budžeta i izvanbudžetskih fondova na teritoriji Federacije BiH.

(2) Taksa iz člana 3. stav (1) tačka c), d) i f) ove odluke se uplaćuje na depozitni račun Budžeta Općine Centar Sarajevo, šifra Općine 077, sa naznakom vrste prihoda 722329 i pozivom na broj 0000000000.

(3) Takse iz stava (1) i (2) ovog člana su prihodi Općine Centar Sarajevo.

DIO PETI OSLOBAĐANJE OD PLAĆANJA I POVRAT TAKSE

Član 13.

(Oslobađanje od plaćanja komunalne takse)

(1) Od plaćanja takse oslobođeni su:

- a) institucije Bosne i Hercegovine,
- b) organi, organizacije i javne ustanove Federacije Bosne i Hercegovine, Kantona, općina sa područja Kantona Sarajevo i Grada Sarajeva,
- c) sve crkve i vjerske zajednice koje su upisane u jedinstveni registar za upis crkava i vjerskih zajednica, njihovih saveza i organizacionih oblika u Bosni i Hercegovini koji vodi Ministarstvo pravde Bosne i Hercegovine,
- d) humanitarne i dobrotvorne organizacije iz osnovne djelatnosti,
- e) udruženja koja ne obavljaju privrednu djelatnost,
- f) vojni invalidi od plaćanja takse iz člana 3. stav (1) tačka a) ove odluke,
- g) lica kojima je rješenjem nadležnog organa priznato svojstvo člana porodice poginulih, umrlih, nestalih i zarobljenih boraca, ratnih vojnih invalida i civilne žrtve rata,
- h) privredna društva za zapošljavanje lica sa invaliditetom i zaštitna radionica,
- i) privredna društva koja se bave poljoprivrednom djelatnošću,
- j) pravno ili fizičko lice koje prvi put registruje djelatnost na području Općine Centar Sarajevo oslobođeno je plaćanja takse po Tarifnom broju 1. u prvoj godini poslovanja,
- k) mladi do 35 godina starosti, a koja prvi put registruju djelatnost na području Općine Centar Sarajevo oslobođeni su plaćanja takse po Tarifnom broju 1. za prve dvije godine poslovanja.

(2) Zahtjev za oslobađanje od plaćanja takse iz stava (1) tačka h) ovog člana podnosi se Poreznoj upravi Federacije Bosne i Hercegovine – Kantonalni porezni ured Sarajevo – Porezna ispostava Centar.

Član 14.

(Povrat pogrešno ili više uplaćene takse)

(1) Obveznik od kojeg je taksa naplaćena, a koju nije bio dužan platiti ili je više uplatio, ima pravo na povrat.

(2) Zahtjev za povrat se podnosi Poreznoj upravi koja je nadležna za utvrđivanje takse.

(3) Porezna uprava je dužna da u roku od 20 (dvadeset) dana od dana prijema zahtjeva odluči o zahtjevu.

Član 15.
(Nadzor i kontrola prijava)

- (1) Nadzor i kontrolu prijava, obračuna i plaćanja općinske komunalne takse vrši Porezna uprava u saradnji sa Službom za privredu i poslovne prostore Općine Centar Sarajevo.
- (2) Služba za finansije Općine Centar Sarajevo je dužna da redovno dostavlja evidenciju uplata Službi za privredu i poslovne prostore.
- (3) Porezna uprava će u roku od 15 dana od dana isteka roka dostavi nadležnoj Službi Općine Centar Sarajevo izvještaj o poreznim obveznicima koji su izvršili prijavu takse.
- (4) Porezna uprava će Službi za privredu i poslovne prostore Općine Centar Sarajevo dva puta u toku kalendarske godine i to za prvu polovinu tekuće godine do 31. jula i za drugu polovinu tekuće godine do 31. januara naredne godine, dostavljati izvještaje o uplati taksenih obaveza.

DIO ŠESTI PRELAZNE I ZAVRŠNE ODREDBE

Član 16.
(Nadzor nad provođenjem)

- (1) Provođenje ove odluke vršit će Porezna uprava FBiH - Kantonalni porezni ured Sarajevo – Porezna ispostava Centar.
- (2) Služba za finansije, Služba za privredu i poslovne prostore i Inspektorat Općine Centar Sarajevo će vršiti povremene kontrole prijava i usklađenosti podataka sa Poreznom upravom, svaka u okviru svojih nadležnosti.

Član 17.
(Prestanak važenja ranijeg propisa)

Stupanjem na snagu ove odluke prestaje važiti Odluka o visini komunalnih taksi Općine Centar Sarajevo („Službene novine Kantona Sarajevo“, broj: 7/13 i 2/19).

Član 18.
(Primjena zakonskih odredbi)

Na sva pitanja koja nisu regulisana ovom odlukom primjenjuju se odredbe Zakona o komunalnim taksama Kantona Sarajevo.

Član 19.
(Stupanje na snagu)

Ova odluka stupa na snagu narednog dana od dana objavljivanja na oglasnoj ploči Općine Centar Sarajevo, a naknadno će biti objavljena u „Službenim novinama Kantona Sarajevo“.

Broj: 01-11-2968/22
Sarajevo, 07.04.2022. godine



Predsjedavajući
Općinskog vijeća Općine Centar

Sejad Đozo

Ova odluka objavljena je na oglasnoj ploči dana 15-04-2022